


Museo Arqueologico Aruba ta cuminza muda pa su cede nobo den Schelpstraat



ORANJESTAD - Museo Arqueologico Aruba (MAA) ta hopi contento cu den luna di November ta cuminza muda pa su ubicacion nobo den Schelpstraat. Awor cu e edificacionan historico a ser restaura y edificacionan nobo a ser construi, personal di MAA lo cuminza muda material di oficina y e coleccion arqueologico di pais Aruba pa e compleho nobo den Schelpstraat.

E Departamento Educativo di MAA lo dreña su oficina den e "White House", riba e di dos piso, mientras cu e Departamento Administrativo ta haya su ubicacion na e prome piso, unda tambe lo bin e area educativo y e biblioteca

specializa riba arqueologia nacional y di regio. Den futuro cercano e biblioteca aki lo ta accesibel pa publico. Departamento Cientifico lo dreña den e "Tenants House" den Emanstraat. Un parti di e edificio di Departamento Cientifico ta un construccion nobo, den cual nan lo tin nan oficina, area tecnico, deposito y laboratorio. E Departamento Maneho di MAA lo muda pa e di dos piso di e "Green House". Actualmente MAA ta den e fase final pa local ta trata e exposicion nobo. 'Lord Cultural Resources', e compania cu ta traha e diseño pa e sala di exposicion, lo presenta e diseño definitivo fin di e aña aki. Despues lo sigui

cu e fase di construccion di e exposicion a base di e diseño. Expectativa ta cu MAA lo habri su sala di exposicion na Schelpstraat pa November 2008.

Mientrastanto, MAA lo cuminza cu su programa publico den e prome cuartal di 2008 den cual lo trece actividadnan diferente pa un publico varia.

MAA ta felicita y gradici comunidad di Aruba, Gobierno di Aruba, especialmente ministerio di Financia y ministerio di Cultura, Oficina di Monumento, Fondo Europeo pa Desaroyo, DOW, Direccion di Asuntonan Economico, UNOCA, Direccion di Finanzas, BK Consult, ALBO y tur otro instancia y personanan cu e joya di edificacionan. Ta un logro grandi pa Aruba su Museo Arqueologico tin un ubicacion asina impresionante, tanto historico como moderno. MAA ta sigui cu e trayecto pa crea un Museo nobo cu ta tanto nacional como internacional riba e nivel mashalto y asina sigui aporta na conserva y promove nos herencia cultural.